



UPA 2017/158  
Nuuk, 30.05.2017  
Kelly Berthelsen

**Meeqqat qinngamikkut-, siutimikkut qinersimikkullu ajuuteqalersartut ikilisarniarlugit pinaveersimatitsiniarnerup qanoq annertusarneqarnissaanut kiisalu ilaatigut siullunnerit kingunerisaannik meeqqat inersimasullu tusillalersimasut tusaaniarnermikkullu akornusersimasut qanoq ikiorserneqartarnissaannut apeqquteqaat aallaavigalugu oqallinnissamut siunnersuut.**

(Inatsisartunut ilaasortaq Debora Kleist, Inuit Ataqatigiit)

Debora Kleistip Inuit Ataqatigiinneersup oqallisissiaa ima Inuit Ataqatigiinniit oqaaseqarfigissavarput.

Siullunneq qoqertarnerlu pissutigalugit tusillanneq ajornartorsiutaqaaq. Inuttut ulluinnarni ajornartorsiutaaginnarani aamma assersuutigalugu ilinniarnermut ajornartorsiutaasarpog.

Qujanartumik ajornartorsiut taanna qanoq iliuuseqarfigineqarsinnaavoq. Periaasissat ilisimasassallu pigineqareerput, taamaallaat inunnut apuunneqarnissaat apeqqutaaginnarpoq.

Tusaaniarneq inuttut ineriartornermut pingaaruteqarluinnarmat inuunerup ilaani siullulernissamut pissutaasinnaasut pinaversaartinneqarnissaat paasitsiniaanikkut pisariaqarpallu malittarisassiornikkut isumagineqartariaqarpoq.

Qujanartumik malittarisassat – pingaartumik suliffimmut tunngasut – naammassuginarput. Taamaammat malittarisassatigut qanoq iliuuseqarneq pinnagu aallutassarput allamiippoq. Tassa ingerlaavartumik qaammarsaanermi ippoq.

Inuilli ulluinnarni inuuneranni eqqumaffigisariaqartut amerlanertigut ilisimaneqaraluarlutik annerusumik siaruarneqarneq ajorput, siaruarneqaraluaangamillu ukiualunnguani sammineqariarlutik unitsinneqartarput uffa meeqqat inunngorartuarmata paasitsiniaaneq ingerlaavartariaqaraluartoq.

Assersuutigalugu: nersussuup immuanik sapigaqarneq siulluttarnermut pissutaaqataasartoq qanoq ilisimaarineqartigiva? Qanoq paasineqarsinnaava?

Sapigaqaraanni suut taartaasinnaappat? Sutteqartitsisarnerup siullunnarsinnaanera ilisimaneqarpa, suut taartaasinnaappat?

Sorpassuit ilisimatusarnikkut paasineqareersut suli inunnut qaammarsaatigineqanngillat.

Allanilli aamma misissugassaqaqarunarpugut. Soorlu, oquk anersaartuutitigut ammmikkullu sapigaqalernerumut pissutaasartuq paasineqareersuq aamma meeraaqat siullutarneranut attuumassuteqarpa?

Tassa, pingaarnepaamik iliuserisariaqagarput, aamma Naalakkersuisut, tassaavoq ilisimariikkanik siammarterinissaq – qaammarsaajuarnissaq - pisariaqarpallu nunatsinni pissutsinik immikkut ittunik, soorlu illut oqunnerinik, misissuinissaq taakkulu qanoq iliuseqarfiginissaat.

Piniartut pingaartumik utoqqaliarsaalersut oqaloqatiginerini maluginianngitsoorneq ajornartarpoq amerlaqisut talerpillermik tusillassimasarnerat, tassa ukiorpassuarni seqqortarsimanerannik pissuteqartoq. Aamma ullutsinni meeqqat inuusuttullu siutequserlutik nipilersuutinik tusarnaartarnerat nalinginnaasorujussuanngorsimavoq. Ilisimatuunillu aarleqqutigineqarpoq ukiorparujussuunngitsut qaangiuppata tusillassimasut amerlanerujussuanngussasut nipituumik nipilersortarnerup kingunerisaanik.

Tamakku qanoq pinaversaartinneqassappat? Tassa periaasissamik nassaartoqartariaqarpoq paasititsiaanerullu ingerlaavarnissaa isumagisariaqarluni. Tamatumunngalu aningaasaliinissaq piareersimaffigisariaqarpoq.

Ajornartorsiutillu taaneqareersut pissutigalugit tusillanneq aallartereersimappat aamma iliususissat naleqquttut pisariaqanngitsuussanngillat. Sinerissami misissuisarnerit naammattumik akulikissuseqarpat? Misissortereersimasut ikiorneqartariaqartutullu paasineqartut ikiorneqarnissaat naammattumik nakkutigineqarpa? Peqqinnissaqarfimmi tamakkuninnga misissuisarnissamut nukissat naammattut pigineqarpat? Assersuutigalugu tusartaatitaarnissamut utaqqisarneq qanoq sivilisutigiva?

Maannamut ajoraluartumik sivilisuumik utaqqisoqartarnera inuit sungiusimaannalersimagunarpaat, tamannalu qaangerneqartariaqavipppoq.

Inuit Ataqtigiinniit naalakkersuisunut kissaatigissavarput ajornartorsiutit matumani eqqartorneqartut eqqumaffigilluaqqullugit, pisariaqarpat misissueqqullugit ajornartorsiutillu paasineqartut pinngitsoornagit qanoq iliuseqarfigeqqullugit.

